

SAMÞYKKT

um hundahald í Neskaupstað.

1. gr.

Hundahald er bannað í Neskaupstað. Heimilt er bæjarstjórn að víkja frá banni um hundahald að eftirfarandi skilyrðum uppfylltum:

- a) Leyfi er bundið við nafn og heimilisfang lögráða einstaklinga og er óheimilt að framselja það. Leyfið er bundið við hund þann sem sótt er um heimild fyrir hverju sinni.
- b) Ef sótt er um leyfi til að halda hund í sambýlishúsi skal skriflegt samþykki sameigenda fylgja umsókn.
- c) Leyfisgjald vegna undanþágu skal greiða til Bæjarsjóðs sem samþykkir gjaldskrá sem heilbrigðisráðherra staðfestir. Leyfisgjald greiðist árlega fyrirfram. Gjaldldagi leyfisgjalds er 1. janúar ár hvert.
- d) Við greiðslu gjalds skv. þessari grein (c-lið 1. gr.) ber hundaeigenda að sýna vottorð dýralæknis um að hundur sé ekki haldinn sjúkdómi og hafi verið hreinsaður af bandormum, svo og önnur skilríki sem máli skipta skv. lögum um hundahald og varnir gegn sullaveiki. Hundar skulu færðir til hreinsunar í október- nóvember ár hvert. Mæti hundaeigandi ekki með hund sinn til árlegrar hreinsunar á boðuðum tíma, ber hann sjálfur þann kostnað sem af því kann að leiða.
- e) Hundaeigandi skal hafa hund sinn ábyrgðartryggðan hjá viðurkenndu váttryggingafélagi. Váttrygging skal ná til alls þess tjóns sem dýr hans kann að valda á mönnum og munum. Lámargtryggingarupphæð verði kr. 10.000.000,00 (tíu milljónir). Vottorð um iðgjalda-greiðslur tryggingar skal framvísa þegar sótt er um undanþágu til hundahalds og þegar greitt er samkvæmt c-lið þessarar greinar.
- f) Hundurinn skal ávallt bera ól um hálsinn. Á ólinni skal vera plata þar sem í er greypt skráningarnúmer hundsins.
- g) Hundurinn skal aldrei ganga laus á almannafæri, heldur skal hann vera í taumi í fylgd aðila sem hefur fullt vald yfir honum. Hundaeigendum er skylt að sjá svo um að hundar raski eigi ró manna með hávaða eða galti, eða verði mönnum til óþæginda á annan hátt. Þegar hundar eru í festi á húsalóðum skal lengd festarinnar við það miðuð að óhindrað megi ganga um dyr íbúðarhúsa. Eigi er leyfilegt að fara með hundinn inn í skóla, íþróttahús, sjúkrastofnanir, sundstaði, almennar skrifstofur, samkomuhús og verslanir, svo og starfsstöðvar hvaða nafni sem þær kunna að nefnast, þar sem úrvinnsla, meðferð eða geymsla matvæla á sér stað. Hundaeigendum ber að viðhafa hreinlæti í meðferð hunda sinna, þar á meðal þrifa eftir dýrin.
- h) Heimilt er bæjarstjórn að ákveða lægra gjald fyrir nauðsynlega minkahunda, leitarhunda, smalahunda og sporhunda. Af hundum sem blindir menn og öryrkjar þurfa á að halda vegna fötlunar sinnar skal ekkert gjald greiða.

2. gr.

Umsókn um leyfi til hundahalds skal leggja fram til bæjarstjórnar, eða fulltrúa hennar á þar til gerðum eyðublöðum. Með umsókninni skulu fylgja ýtarlegar upplýsingar um hundinn. Umbeðið leyfi skal aðeins gefið út að fengnu samþykki bæjarstjórnar.

Upplýsingar um hundinn skal færa í þar til gerða bók hjá dýraeftirlitsmanni. Þar skal einnig skrá nafn og heimilisfang leyfishafa.

Senda skal embætti sýslumanns í Neskaupstað afrit af leyfisbréfi. Leyfishafi skal fá afhenta merktu plötu sbr. f-lið 1. gr. og eintak af samþykkt um hundahald í Neskaupstað.

3. gr.

Dýrefitirlitsmaður skal vera starfandi í Neskaupstað og setur bæjarstjóri honum starfsreglur. Skal hann gefa bæjarstjóra, eða fulltrúa hans sem með þessi mál fer skriflega skýrslu um þá hunda sem hann þarf að hafa afskipti af.

4. gr.

Ef leyfishafi brýtur alvarlega eða ítrekað gegn ákvæðum samþykktar þessarar eða öðrum reglum sem um hundahald gilda, afturkallast leyfið sjálfkrafa. Einnig getur bæjarstjórn afturkallað öll leyfi til hundahalds telji hún þess þörf. Við fyrsta brot, ef lítilvægt er skal veita viðkomandi skriflega áminningu.

5. gr.

Þeir hundar sem leyfi er til að halda, en ganga lausir utan húss skulu handsamaðir og færðir í sérstaka hundageymslu á vegum bæjarins. Þar skulu hundar geymdir í allt að 7 daga meðan eigendum gefst kostur á að leysa þá út.

Kostnaður við töku og geymslu hunda skal að fullu greiddur af eigendum, samkvæmt gjaldskrá sem bæjarstjórn samþykkir og heilbrigðisráðherra staðfestir, sbr. staflíð c í 1. málsg. 1. gr. Hirði eigendur hunda ekki um að leysa þá út innan 7 daga frá því að þeir voru teknir, né greiði af þeim áfallinn kostnað skulu hundarnir aflífaðir.

6. gr.

Þeir hundar sem ekki er leyfi til að halda skulu teknir og færðir í sérstaka hundageymslu á vegum bæjarins. Þar skulu hundarnir geymdir í allt að 7 daga, meðan eigendum gefst kostur á að koma þeim fyrir til frambúðar utan marka kaupstaðarins.

Kostnaður við töku og geymslu hunda skal að fullu greiddur af eigendum, samkvæmt gjaldskrá sem bæjarstjórn samþykkir sbr. 5. gr. og staflíð c í 1. málsg. 1. gr. Hirði eigendur hunda ekki um að leysa þá út innan 7 daga frá því að þeir eru teknir, né greiði af þeim áfallinn kostnað skulu hundarnir aflífaðir.

7. gr.

Hættulega hunda sem ráðast á menn eða skepnur, skal fjarlægja þegar í stað. Lögreglustjóri og dýraeftirlitsmaður taka ákvörðun um það hvernig með skuli fara og geta þeir afturkallað leyfi og fyrirskipað aflífun hunds og skal hún fara fram að höfðu samráði við dýralækni.

8. gr.

Um önnur atriði og brot gegn samþykkt þessari eða gegn reglum settum samkvæmt þeim fer skv. lögum um hollustuhætti og heilbrigðiseftirlit nr. 81/1988 með síðari breytingum.

9. gr.

Samþykkt þessi sem samin er og samþykkt af bæjarstjórn Neskaupstaðar staðfestist hér með samkvæmt 22. gr. laga nr. 81/1988 um hollustuhætti og heilbrigðiseftirlit sbr. og 1. gr. laga nr. 7/1953 um hundahald og varnir gegn sullaveiki til þess að öðlast gildi þegar í stað. Jafnframt fellur úr gildi samþykkt um hundahald í Neskaupstað nr. 115/1977.

Heilbrigðis- og tryggingamálaráðuneytið, 12. ágúst 1992.

Sighvatur Björgvinsson.